



Segnan er per l'organisaziun da l'occurrènz per gourmets: Martin Scherer, Reto Mathis, Heinz E. Hunkeler (da san.).

Tge per ina cucagna culinara

San Murrezzan: Avertura dal Festival per gourmets

DA GION NUTEGN STGIER / ANR

■ **Grond «kino» venderdi saira a l'hotel Kulm tar l'avertura da l'ediziun da giubileum dal Festival per gourmets. Ina giada dapli èn ils stars cuschiniers ids sur cunfins cun lur tratgas finas. L'occurrènz cuzza anc questa emna.** San Murrezzan è na be glamur e traglischur, mantes da pail, odurs da parfums, vesair ed esser vesai, na San Murrezzan è er in paradys per grond daletg culinar. Quai ha danovamain testifitgà l'avertura dal Festival per gourmets venderdi saira en las localitads singularas da l'hotel da luxus Kulm. En il fratemp è quai gia la 25avla giada che San Murrezzan daventa per in'emna ina vaira cucagna culinara nua che l'elita da cuchinieras e cuschiniers internaziunals s'inscuntran.

In ambient festiv

Per l'emprima giada en l'istorgia dal Festival per gourmets ha l'avertura, il grond «Opening», gi lieu en las salas da l'hotel da tschintg stailas Kulm. Per l'occurrènz saja quai in vair gudogn, ha ditg *Reto Mathis*, il president dals events dal festival per mangiabains. Quels èn lura er vegnids en rotscha, vestgids elegants, a

nair, ed ils diamants da la bischutaria splendoravan anc blier pli fitg en las glischs da luxus cun ir las damas d'ina sala en l'autra. En tut las davosas 24 ediziuns dal Festival per gourmets, in ambient uschè festiv, uschè amiaivel, uschè chaud e cun ina uschè gronda expressiun han ins mai vesai tar l'occurrènz d'avertura. Ils gourmets han giudi l'atmosfera glamurusa cun ina participaziun internaziunala. Schampagn, vin franzos e piculezzas finas da mangiar han enritg fitg la saira uschia che quella è daventada ina vaira avventura culinara.

Nagina fadia da chattar cuschiniers

Reto Mathis, quasi il «motor» dal Festival per gourmets, ha ditg che San Murrezzan saja en ina situaziun ventiraivla cun sia occurrènz culinara. «Nus avain strusch d'ir a la tschertga da cuchinieras e cuschiniers per il festival, cun quels e quellas bunamain spetgar da pudair vegnir en l'Engiadin'Ota», punctuescha Mathis, el che tutga sez tar ils cuschiniers da la tribuna gronda. Da menziunar è lura er che Mathis e ses cunorganisaturs dal Festival per gourmets han buns contacts tar cuschiniers e cuchinieras dals megliers restaurants da l'entir mund. Cun

esser il festival per mangiabains a San Murrezzan e conturn in da quels dal grond «kino» entaupan ils visitaders da quel er adina amis che derivan da tuts tschintg continents e quai be per sa laschar pupragnar culinaric e quai durant in'emna. L'occurrènz è na be in inscunter dals megliers cuschiniers dal mund, na ella è er in inscunter tranter ospitants e giasts che sa conuschan cun adina pupspè sa laschar ir bain en ils restaurants da luxus da New York fin Singapur e da San Murrezzan fin Zermatt.

Da la Tailanda en il Grischun

El saja vegni gudent a San Murrezzan, ha menziunà *Ian Kittichai*, el che tutga tar in dals stars-cuschiniers da la Tailanda. La saira d'avertura ha el fascinà ils gourmets cun servir charn da biestg gross pargialada durant 12 uras e quai en ina sosa da curry e da qualidad fitg fina. *Jörg Schlossmann*, el è en Germania ina icona tranter ils cuschiniers cun cuschinar uschè fin ch'el ha schizunt duas stailas da «Michelin». Tar il grond «Opening» ha el cuschinà cun ils cuschiniers da l'hotel Waldhaus a Segl merengas da rischotschnas cun pesch, dir d'auca ed ampuanas.



Ils cuschiniers da l'hotel Waldhaus a Segl cun lur giast-cuschinunz Jörg Sackmann (a dretga).



È qua il team da l'hotel Suvretta cun il schef-cuschinier Fabrizio Zanetti (terz da san.).



Piculezzas finas e da bun gust.



Schampagn senza fin.



Stads a l'avertura èn er Vic e Helene Jacob, ils anteriurs directurs da l'hotel Suvretta e Tamara e Dario Cadonau dal restaurant per gourmets In Lain a Brail (da san.).

FOTOS G. N. STGIER/A. METTLER



Han vivi e vivan anc adina per il restaurant Talvo a Champfèr: Martin Dalsass, Brigitte e Roland Jöhri (da san.).